



UCAPAN PERASMIAN

**YB DATUK SERI DR. NORAINI BINTI AHMAD
TIMBALAN MENTERI PEMBANGUNAN WANITA, KELUARGA
DAN MASYARAKAT**

SEMPENA

**PROGRAM ADVOKASI KESEJAHTERAAN UNTUK WANITA
@KEGANASAN RUMAH TANGGA (AKU WANITA@KRT)
NEGERI PERAK**

TARIKH / MASA / TEMPAT

**20 OGOS 2025 | 8.00 am | DEWAN GALASA CALDWELL,
IPOH, PERAK**



Assalamualaikum Warahmatullahi Wabarakatuh.

Salam Sejahtera,

Salam Malaysia Madani,

Terima kasih kepada pengacara majlis

[Salutasi disediakan]

(A) PENDAHULUAN

1. Alhamdulillah, bersyukur kita kepada Allah S.W.T kerana dengan limpah kurnia-Nya dapat kita sama-sama berkumpul pada pagi yang bermakna ini dalam **Program Advokasi Kesejahteraan untuk Wanita@Keganasan Rumah tangga (Aku Wanita@KRT)**.
2. Terlebih dahulu, saya ingin merakamkan **ucapan tahniah dan penghargaan kepada Jabatan Pembangunan Wanita (JPW)** selaku penganjur program dan **Pejabat Pembangunan Wanita Negeri Perak (PPWN)** selaku tuan rumah atas pelaksanaan program ini.
3. Saya juga ingin merakamkan ucapan ribuan terima kasih kepada hampir **500 peserta** yang sudi hadir meluangkan masa dan memberi sokongan kepada program ini.
4. Komitmen seperti ini amat bermakna dalam usaha menyokong **kempen menangani keganasan terhadap wanita**.

(B) KES KEGANASAN RUMAH TANGGA

Hadirin yang saya muliakan,

5. Keganasan rumah tangga bukan sekadar isu peribadi atau hal rumah tangga semata-mata. Ia adalah **satu kesalahan jenayah dan pelanggaran hak asasi manusia** yang menjadi **ancaman senyap** terhadap kesejahteraan institusi keluarga.
6. Realitinya, penderaan dan keganasan dalam rumah tangga masih berleluasa dan ia berlaku dalam pelbagai bentuk, bukan sahaja secara fizikal, tetapi juga secara emosi, seksual, ekonomi dan psikologi yang boleh memberi kesan jangka panjang terhadap mangsa, terutamanya wanita dan kanak-kanak.
7. Kebanyakan kes keganasan rumah tangga dilakukan oleh orang yang dikenali wanita tersebut seperti suami, bekas suami atau teman lelaki dan kerap kali kes tidak dilaporkan kerana malu berhadapan dengan stigma masyarakat.
8. Terdapat juga kes di mana mangsa tidak tahu cara untuk membuat laporan dan tidak sedar bahawa mereka adalah mangsa keganasan rumah tangga.

9. Ini berlaku mungkin disebabkan pemikiran mangsa telah dimanipulasi sehingga mangsa merasa bingung dan meragui pemikiran dan persepsi mereka sendiri.
10. Pelaku mungkin menyalahkan mangsa atas perkara yang tidak berlaku atau memutarbelitkan fakta bagi menimbulkan rasa tidak berdaya, sekali gus menyebabkan trauma yang mendalam kepada mangsa.
11. Situasi ini memberi kesan jangka masa panjang terhadap kesihatan mental dan kesejahteraan emosi mangsa.
12. Statistik oleh **Polis Diraja Malaysia (PDRM)** menunjukkan bahawa pada **tahun 2024 sahaja, sebanyak 7,116 kes keganasan rumah tangga telah dilaporkan** dan sehingga **April 2025**, sebanyak **2,467 kes** telah direkodkan. Bagi **negeri Perak, kes keganasan rumah tangga bagi tahun 2024 adalah sebanyak 842** telah dilaporkan. Negeri **Perak juga merupakan antara lima negeri tertinggi dari segi nisbah kes** berbanding populasi penduduk seramai 2.6 juta orang.
13. Bagi tahun 2025, **sehingga April 2025** kes yang dilaporkan di negeri Perak adalah sebanyak **425 kes**, berbanding 175

kes dalam tempoh yang sama pada tahun lepas. Angka Ini menunjukkan peningkatan ketara dalam tempoh setahun.

**(C) CABARAN PROGRAM ADVOKASI KESEJAHTERAAN
UNTUK WANITA@KEGANASAN RUMAH TANGGA (AKU
WANITA@KRT)**

Hadirin yang dihormati sekalian,

14. Sebagai sebuah Kementerian yang bertanggungjawab terhadap pembangunan wanita, keluarga dan masyarakat, **KPWKM sentiasa komited dalam memperkukuhkan dasar, undang-undang serta mekanisma** dalam menyampaikan maklumat dan sokongan kepada komuniti terutamanya mangsa keganasan rumah tangga.
15. Justeru, usaha untuk meningkatkan kesedaran, memberi keyakinan dan keberanian kepada wanita untuk bersuara, serta menyediakan ruang sokongan dan pemulihan yang selamat merupakan komponen penting dalam menangani isu ini secara menyeluruh.
16. Bagi tujuan berkenaan, **Program Advokasi Kesejahteraan untuk Wanita@Keganasan Rumah Tangga** atau **Aku Wanita@KRT** diwujudkan sebagai platform strategik bagi

mendekati masyarakat melalui aktiviti berimpak tinggi yang telus terhadap masyarakat dalam menangani masalah KRT.

17. Melalui program ini, isu-isu berkaitan keganasan rumah tangga akan dibincangkan secara mendalam bersama pakar dalam bidang tersebut dan juga pemandiri yang telah bangkit dari masalah KRT sebelum ini.
18. Selain itu, sesi intervensi psikologi yang dinamakan **“K-Chat”** juga telah diperkenalkan. Sesi ini merupakan intervensi berkumpulan antara pemandiri bersama kaunselor dan fasilitator terlatih untuk membantu peserta memahami dan menangani isu yang melanda diri akibat keganasan.
19. Selain program ini, KPWKM menerusi JPW juga telah menjalankan pelbagai program lain bagi membantu wanita seperti forum keganasan rumah tangga bertajuk “Ayoh Berani Lapor”, program psikopendidikan seperti Program Meningkatkan Daya Tahan dan Psikologi Wanita (Matahari) dan Program Literasi Perundangan dan Hak Wanita (IRIS) serta Skuad Waja.
20. Kami di KPWKM berharap dengan penganjuran program seumpama ini akan dapat meningkatkan kesedaran dan memberi manfaat kepada para peserta kerana keganasan

rumah tangga memberi kesan besar terhadap institusi sosial negara kita.

(D) PENUTUP

21. Komitmen KPWK M untuk menangani keganasan rumah tangga adalah jelas dan tidak berbelah bahagi. Kita akan terus melaksanakan program berbentuk pencegahan, perlindungan dan pemulihan, agar tiada siapa pun tercicir daripada sistem sokongan yang diwujudkan.
22. Akhir kalam, dengan lafaz “Bismillahir Rahmanir Rahim”, sukacitanya saya merasmikan **Program Advokasi Kesejahteraan untuk Wanita@Keganasan Rumah Tangga atau Aku Wanita@KRT Negeri Perak.**

Sekian, Wabillahi taufiq walhidayah Wassalamualaikum warahmatullahi Wabarakatuh.

YB Datuk Sri Dr. Noraini binti Ahmad
Timbalan Menteri Pembangunan Wanita, Keluarga Dan Masyarakat
20 Ogos 2025